

PAR AMÔR DAL FRIÛL NO TASARAI

Ponts inrinunciabii par ogni discors su la cuistion furlane

1. La dignitât de persone

Il moment storic che o stin vivint al à puartât benstâ, ma al met in pericol il valôr di fonde de dignitât de persone. Il sisteme consumistic, cence scrupui, al ridûs l'om a rût consumadôr di robis e di modis. E la television i dà une man in chest bombardament seguitîf.

Il Friûl al à rivât a mantignî ancjemò valôrs come la lenghe, la identitât culturâl, lis piçulis comunitâts, une economie a nivel artesanâl, un teritori vonde armoniôs par une vite umane.

Ma cumò rivarino a puartâle fûr intun moment li che in non dal progrès nus ven puartade vie la dignitât de persone e i valôrs come prime ricjece de int?

Salacôr sì, se il stât, la scuele, la glesie a començaran a vê stime e rispjet di nô e nus daran, cence cjacaris ma cun serietât e impegn, une man.

Par nô, lavorâ par recuperâ e mantignî la dignitât-identitât de persone in chest teritori, al è vuê un dovê che no si pò rinunciâ.

2. La culture e la lenghe

Il Friûl al è une tiere li che a vivin insieme popui des trê grandis culturis da l'Europe: la latine, la gjermaniche e la slave cu la lôr lungje tradizion che si piert tai secui.

Stant che no àn pierdude la lôr identitât, i furlans no àn mai dismetût di fâ sintî la lôr vôs midiant di tantis iniziativis culturâls, pulitichis e religiosis. Une grande batae inibide soledut dal stât e de scuele e colpide vuê dal sisteme “merecan” che al sbelee ogni forme di culture che no jentre te sô logjiche di marcjât.

Un popul al salve sè stes ancje midiant de lenghe.

La marilenghe e à di jessi doprade e cun prioritât dapardut là che si vîf e si opere, tant a dî tes istituzions publichis, te scuele e te glesie.

O domandìn a la scuele di finîle cu la idee antisientifiche che il furlan al sedi un ostacul pal talian e pe culture in gjenerâl.

La int no à dome problemis culturâi, ma une buine fonde culturâl e je la miôr gnervadure par tignî unît e vîf un popul.

3. Friûl e piçulis comunitâts

Il vêr Friûl si pò cjatâlu soledut in chê “fragmentazion corâl” che a son lis piçulis comunitâts. Copant chês, come che si sta fasint cumò cun iniziativis neocapitalistichis par ingrumâ ducj tai concentraments urbans, si cope il Friûl.

Chest spopolament nol è volût de int, ma comandât di interès economics e pulitics. Intant i paîs a restin cence int e la int cence paîs.

Ormai tes piçulis comunitâts a vegnin sieradis scuclis, glesiis e comuns. In plui a scuegnin sierâ ostarie e buteghe che a garantissin l'ultin tic di socialitât. E intant il stât al rive in chescj paîs che a stan piês dome par metiur lis identichis tassis che al met a chei che a stan miôr. Cun di plui, lis piçulis comunitâts a vegnin rapinadis ancje des aghis, dai terens e dai boscs.

Une disgracie di no imbramâle a di nissun.

Une pulitiche, lu disìn a fuart, dute di gambiâ.

4. Une economie a servizi dal om e dal teritori là che al vîf

Il Friûl al risint dal moment economic recessîf di cumò. Al sta mancjant il lavôr soledut pai zovins.

In cheste situazion no podarìn, intal mont interdependent di vuê, lâ viers une economie di autarchie, ma nancje diventâ sclâfs di sieltis fatis a centenârs di chilometri di culî.

Tant mancul cjapâ sù un'altre volte la valîs.

I operadôrs economics a àn la responsabilîtât di dâ dongje un gnûf implant economic che al tegni presint l'indule de nestre int e la configurazion e l'integritât dal teritori.

Il Friûl, taiât fûr de grande industrializazion, al pò ripiâsi cuntune pulitiche che e scomenci a cjalâ cun voli diferent a l'agricolture de plane e de mont, a lis risorsis naturâls dal teritori, a un turisim rispjetôs di int e di lûcs, a chei mistîrs che nus àn permetût di vivi e di palesâ la nestre creativitât.

Il dut al va insuazât te nestre posizion centrâl in Europe cun ce che di pusitîf chest al compuarte.

No podìn jessi ridusûts a rude tiere di passaç.

La sfide di une economie a servizi dal om e à di cjapâ dentrí, in prime rie, la nestre region che e à plui la innomine di jessi autonome che une vere volontât di autonomie.

5. Friûl une nazion cence cunfins

Ogni discors sul cont di un popul al à di tignî cont de storie e de gjeografie. La storie e la gjeografie a àn caraterizât il svilup dal Friûl come nazion, crosera di popui e farie di culture.

Cheste posizion e cheste storie, vêrs polmons che i àn permetût di respirâ e di florî, e je stade disledrosade par colpe de pulitiche nazionalistiche da l'Italie, che e à fat il delit di sierânus i nestris cjanâi storics, culturâi e economics cu la Carintie e la Slovenie.

Bisugne vê il coragjo di butâ vie vecjis ideologjii e mitologjii statalistis par che il Friûl al puedi vivi la sô realtât pluriculturâl e economiche in relazion cui popui dongje e ripiâ la sô colocazion naturâl te crosera des grandis culturis che a àn fate l'Europe.

E je cheste une buine strade rispjetose dal passât e davierte a l'Europe dai popui.

6. Une classe pulitiche gnove e libare par un progjet gnûf e alternatîf

Ducj o savìn che il centralisim esasperant dal stât talian al à cundizionade la classe pulitiche furlane. Une classe sotane di Triest e di Rome.

A chest difiet di mani si à di zontâ cumò il scandul dal malguviêr talian che al à intosseade la vite pulitiche e che al à cjatât il mût di fâ la cove ancje chi di nô.

In cheste situazion nô o domandìn ai gnûfs sorestants di vê, cu lis cualitâts de onestât e de competence, la passion pe int e pai siei valôrs gjenuins; di inlidrisâsi cence complès di inferioritât te nestre realtât storiche e culturâl; di tignî cjare, inte diviersitât la unitât dal Friûl storic di tornâ a tirâ dongje la int in formis di responsabilîtât personâl e coletive; di judâ soledut i piçui, artesans, operaris, contadins a interessâsi dal ben public cun plui stime di sé e plui coragjo; che si prepari la nestre int a cjapâ puescj di responsabilîtât pulitiche cence dipendi simpri dai forescj.

Su cheste fonde che al scomenci un gnûf implant pulitic, istituzionâl de region autonome e di responsabilîtâts di ducj pal ben di ducj.

7. La glesie locâl e à di dânus segnos clârs di conversion

Par ultin, ma no come impuartance, un apel a lis autoritâts de nestre glesie erêt dal Patriarcjât di Aquilee.

Ur disin che a une glesie che si presente simpri sigure di sé, int preferin une disponude a convertîsi.

In particolâr: conversion a la veretât, a la puaretât e libertât. Libare dal podê ancje rivant prime dal stât al ricognossiment dal nestri dirit di doprâ la marilenghe inte liturgjie.

Conversion a un Vanzeli insedât te vite de int e inculturât te nestre realtât pluriethniche, cence nissune colonisazion.

Conversion al rispjet de cussience pulitiche des personis lassantlis finalmentri libaris di fâ lis lôr sieltis.

Tal moment politic di cumò, la glesie e à une sole strade: tasê. I servissarà par rifleti sui siei pecjâts di conivence e di omission. Cuant che si presentarà piçule e pintude il popul le scoltarà ancjemò, cun plui gole e stime.

Friul, ai 3 di avril dal 1993, fieste de Patrie

**Comitât pal ricognossiment dal dirit di doprâ
in Friûl lis lenghis furlane todescje e slovene**

Par informazions e pe adesion di grops culturâi:

Coordenadôr. Pressac Zuan

Borc di Mieç, 15 - 33030 Turide (UD)